



Pou Biblikasyon Imedya: 05/10/2023

GOUVÈNÈ KATHY HOCHUL

## GOUVÈNÈ HOCHUL ANONSE YO ANILE FRÈ APLIKASYON NAN KOLÈJ PIBLIK AK PRIVE ETA YO OKTÒB SA A

*Pou premye fwa, SUNY, CUNY, ak plis pase 40 kolèj ak inivèsite prive ap mete tèt yo ansanm pou anile frè aplikasyon pandan Mwa Aplikasyon pou Kolèj la*

*Yon lis konplè kanpis k ap patisipe yo ak enfòmasyon konsènan anilasyon frè yo disponib isit la; yo ankouraje etidan yo pou yo aplike*

Gouvènè Kathy Hochul te anonse jodi a Inivèsite Eta New York (State University of New York, SUNY) ak Inivèsite Vil New York (City University of New York, CUNY), ak 40 kolèj ak inivèsite prive nan Eta New York pral gen opòtinite aplikasyon gratis pou elèv ki nan fen etid segondè yo pandan tout mwa oktòb la. Se premye fwa SUNY, CUNY, ak enstitisyon prive New York yo pral mete tèt yo ansanm pou anile frè aplikasyon pou elèv k ap aplike pandan Mwa Aplikasyon pou Kolèj Eta New York.

"Edikasyon se kolòn vètebral sosyete nou an, epi mwen pran angajman pou bay opòtinite ki sipòte pakou chak etidyan nan yon edikasyon siperyè", **Gouvènè Hochul te deklare.** "Pandan n ap selebre Mwa Aplikasyon pou Kolèj nan Eta New York, mwen kontan dèské SUNY, CUNY, ak plizyè enstitisyon prive New York pral anile frè aplikasyon yo. Retire baryè finansye yo pèmèt etidyan ki pa te konsidere ranpli yon aplikasyon akòz kontrent finansye yo pou fè premye pa yo nan pakou edikasyon pa yo. Mwen ankouraje tout elèv ki nan fen etid segondè yo nan eta a pou yo aplike nan omwen yon kolèj mwa sa a epi pou yo pwofite inisyativ san parèy sa a."

Pou sipò mwa aplikasyon pou kolèj la, SUNY ap anile frè aplikasyon nan tout 64 kolèj ak inivèsite pou de semèn apati 16 oktòb jiska 29 oktòb epi CUNY ap anile frè aplikasyon atravè tout 25 kanpis pandan tout mwa pou elèv ki nan fen etid segondè yo nan lekòl leta nan Vil New York yo epi pou tout rezidan Eta New York yo ki pral aplike kòm etidyan premye ane ant 16 ak 31 oktòb. CUNY te garanti tou admision nan tout sèt kolèj kominotè pou nenpòt etidyan ki gen yon diplòm lekòl segondè. Anilasyon frè nan enstitisyon prive yo varye selon enstitisyon k ap patisipe pandan mwa a.

Ou ka jwenn lis konplè kolèj ak inivèsite k ap patisipe yo, enfòmasyon sou kilè yo pral anile frè yo, ak kijan pou aplike pou chak lekòl isit la.

HESC, SUNY, ak CUNY te pwograme evènman vityèl ak an pèsòn pandan tout mwa a pou ankouraje etidyan yo aprann plis sou èd finansye Eta New York la, enfòme elèv yo sou opsyon kolèj yo, epi ede yo ranpli aplikasyon yo. Pou jwenn yon lis plis pase 70 evènman èd finansye HESC òganize klike [isit la](#). Ou ka jwenn sesyon SUNY [isit la](#) epi ou ka jwenn yon lis plis pase 100 evènman CUNY òganize [isit la](#).

Inisyativ Mwa Aplikasyon pou Kolèj Eta New York la ankouraje elèv ki nan fen etid segondè yo pou yo aplike pou kolèj bonè ak yon konsantrasyon sou elèv ki soti nan fanmi ki gen revni fèb yo, elèv premye jenerasyon yo, ak elèv ki otreman pa ka aplike pou kolèj yo.

Gouvènè a te pwoklame mwa oktòb kòm Mwa Aplikasyon pou Kolèj nan Eta New York pou sansibilize sou gwo opòtinite edikasyon siperyè atravè Eta New York epi pou sipòte etidyan k ap chèche pouswiv edikasyon siperyè yo. Pwoklamasyon an disponib [isit la a](#).

Nan dizyèm ane li a, Mwa Aplikasyon pou Kolèj Eta New York la, ki se yon pati nan Kanpay Nasyonal Aplikasyon pou Kolèj Ameriken an, se Kòporasyon Sèvis Edikasyon Siperyè (Higher Education Services Corporation, HESC) Eta New York ki kowòdone li an patenarya ak Depatman Edikasyon Eta New York (New York State Education Department, NYSED), SUNY, CUNY, Komisyón Fakilte ak Inivèsite Endepandan (Commission on Independent Colleges and Universities, CICU), Depatman Edikasyon Vil New York, ak òganizasyon kominotè yo atravè eta a. Plis pase 600 lekòl segondè atravè Eta New York anrejistre pou patisipe nan inisyativ ane sa a.

**Prezidan Kòporasyon Sèvis Ansèyman Siperyè Eta New York (New York State Higher Education Services Corporation) la, Dr. Guillermo Linares, te deklare,** "Pandan n ap antre nan Mwa Aplikasyon pou Kolèj la, y ap raple nou edikasyon siperyè se yon chemen enpòtan pou reyisit, epi nou dwe kraze tout baryè ki anpeche elèv yo reyalize rèv yo. Anile frè aplikasyon yo bay yon zouti enpòtan pou kraze baryè finansye yo epi asire ke chak elèv ki kalifye ka reyalize potansyèl yo atravè edikasyon siperyè. Mèsi, Gouvènè Hochul, paske w te deklare mwa Oktòb la kòm Mwa Aplikasyon pou Kolèj nan Eta New York epi ou te debloke posiblité posib pou mete edikasyon siperyè disponib pou plis Nouyòkè."

**Rektè SUNY an, John B. King, Jr., te deklare,** "Genyen yon plas nan SUNY pou chak Nouyòkè, epi Mwa Aplikasyon pou Kolèj la se yon opòtinite pou SUNY ede chak elèv ki nan fen etid segondè jwenn plas pa yo. Mèsi Gouvènè Hochul paske li defann enpòtans edikasyon siperyè piblik epi fè li pi fasil pou etidyan yo aplike nan kolèj. Nou pa ka tann pou akeyi etidyan potansyèl yo nan 64 kampus SUNY yo epi montre yo tout kote pakou edikasyon pa yo ka mennen."

**Rektè CUNY an, Félix V. Matos Rodríguez te deklare,** "Nou kontan pou nou mete fòs ansanm ak enstitisyon edikasyon siperyè yo atravè Eta New York pou Mwa Aplikasyon pou Kolèj la epi pou nou kapab anile frè aplikasyon CUNY an pou plizyè dizèn milye kandida potansyèl pandan mwa oktòb la. Nou remèsyé Gouvènè Hochul ak patnè nou yo nan gouvènman an paske yo sipòte inisyativ sa a, ki pral senplifye pwosesis

aplikasyon an, ogmante sipò pou elèv ki pa panse kolèj se yon opsyon pou yo epi ede fèmen diferans ekite nan edikasyon siperyè a."

**Komisè Edikasyon Eta New York la, Betty A. Rosa, te deklare**, "Pou anpil Nouyòkè, sitou sila yo ki soti nan fanmi ki gen revni fèb, frè aplikasyon pou kolèj yo kapab yon gwo baryè finansye ki ka dekouraje elèv ki otreman kalifye pou aplike nan enstitisyon edikasyon siperyè yo. Nan non Konsèy Administrasyo an ak Depatman an, mwen ta renmen remèsye Gouvènè Hochul paske li te dirije efò pou anile frè aplikasyon pou elèv k ap aplike nan anpil kolèj ak inivèsite piblik ak prive nan eta nou an nan mwa sa a. Sa a bay tout moun menmchans, pou asire ke tout elèv ki vle gen aksè ak yon opòtinite egal pou pouswiv objektif akademik yo."

**Rektè Lekòl Piblik Vil New York la, David C. Banks, te deklare**, "N ap antre nan yon vwayaj transfòmatif ak kolèj yo atravè Eta New York pou asire ke elèv ki nan fen etid segondè yo nan Lekòl Piblik Vil New York yo wè yon chemen klè nan edikasyon siperyè ak yon karyè byen peye. Inisyativ sa a ap ranfòse mesaj ke yon edikasyon kolèj se pa sèlman yon rèv, men se yon reyalite ke tout moun kapab atenn. Mwen kontan patenarya ant SUNY, CUNY ak divès enstitisyon prive ki te fè tout sa posib, ak pòt li pral ouvri pou jèn nou yo. Ansanm, n ap konstwi yon avni ki pi briyan pou jèn nou yo epi brize baryè ki anpeche anpil moun reyalize potansyèl yo."

**Prezidan Komisyon Fakilte ak Invèsite Endepandan (Commission on Independent Colleges and Universities) yo, Lola W. Brabham, te deklare**, "Nan non Sektè Endepandan New York la, CICU fyè pou l sipòte Mwa Aplikasyon pou Kolèj la pou ogmante kantite elèv k ap aplike nan kolèj, espesyalman elèv premye jenerasyon yo ak elèv ki soti nan gwoup ki tradisyonèlman pa reprezante ase yo. Kolèj ak invèsite endepandan New York yo rete angaje pou bay aksè ak opòtinite pou asire tout elèv yo ka benefisyé enpak transfòmasyon edikasyon siperyè."

Mwa Aplikasyon pou Kolèj New York la se yon pati nan Kanpay Aplikasyon Nasyonal pou Kolèj Ameriken an, ki patwone pa Sant pou Ekite nan Aprantisaj ACT la. Premye Jounen Aplikasyon Kolèj la te kòmanse kòm yon pilòt nan yon sèl lekòl segondè nan North Carolina an 2005. Depi lè sa a, pwogram nan ogmante pou l enkli tout 50 eta yo ak Distri Columbia epi, apati 2022, li te ede plis pase 4.2 milyon etidyan soumèt plis pase 7.3 milyon aplikasyon.

###